


Saehmizyinx Seiziq

武宣县桐岭镇新龙小学五(1)班 Vangz Cwngzlang/黄程浪



“Mbouj miz haeux lo, bae nganz haeux lu!” Moix mbat dingq daengz daxboh gangj coenz vah neix, gou couh nyaenx mbouj ndaej ngeix daengz gienh saeh mizyinx seiziq haenx.

Baez haenx daxboh umj song daeh haeuxgok cuengq gwnz cingx lo, aeu doi bae nganz. Daxboh

song fwngz gaem dawz ganjci, caenh rengz beng ganjci, ci couh menhmenh baenaj lo. Gou cang bang gaem dawz daehhaeux, youq laeng bang gingx ci, hoeng ndawsim gag ngeix dwk: Caj ci roengz lingq le, gou couh diuq hwnjbae naengh, hihi……

Ci yied bae yied vaiq. A! Daengz aen lingq raez le! Gou naj riu lumj dujva, lwgda muengh seiqhenz miz mbouj miz vunz, caiq yawjyawj daxboh fwngz rag ci, de gaeng dawz ganjci daix hwnjdaeu, song din caenh rengz daemh dei, najaek enj dwk, laengci yaek doh namh, seizneix ndaw sim gou couh angq lo. Song fwngz gaem dawz daehhaeux, gaiq ga ndeu sikhaek daix hwnjdaeu yaek diuq hwnj gwnz ci bae, cingq youq seizhaenx, cij dingqnyi “bung” sing ndeu, gou naengh haeu gwnzci la. Gou cij yaek caeg riu, yaep haenx ci couh yaek fan lo, hoeng, gangj seiz haenx, cij raen daxboh fwngz caenh rengz gaemh gyauejci. O! Ci dauq bingz gvaqdaeu, mbouj miz saeh lo. Gou danq gaemz hei raez ndeu, fwngz rub najaek, ndawsim gag nam: “Hu hu hu, hwk dai lo.”

“Mwngz dahlwg neix, naengh hwnj ci hix mbouj

lwnh gou nyi, haxbaenh ca di deng fan ci.” Daxboh sim’in youh hozndat dwk naeuz. Gou mbouj nyinhcaen dingq, hoeng, ndaw bak cij han naeuz “Ngwz ngwz.” Gou naengh youq gwnz cingx, daekciq dangqmaz, aeu song fwngz iq beng bingz vaqbu, naengh cingq youq gwnz cingx, gou couh lumj dahgunhcuj ityiengh. Yawjraen doengzdoi, engqgya daekciq, menhmenh ndwn hwnjdaeu, cang yawj fungging, seiz mbouj seiz aeu fwngz rubrub byoemgyaeu. “Naengh roengzdaeu, caj seiz youh laemx lo.” Daxboh daihsing naeuz gou. Gou youh dawz dinbuh hwnjdaeu, menhmenh naengh roengzdaeu.

Haeuxsan mbouj miz lo, youh deng bae nganz haeux la, daxboh youh gwed haeuxgok cuengq youq gwnz cingx. Seiz lwgnyez gvaqbae le cix mbouj rox dauqma. Gij saeh bae nganz haeux seiz caegcaeg diuq hwnj gwnz ci haenx, gou caiq mbouj bae guh lo. Hoeng gou siengjniemh seiz lwgnyez gij saeh caeuq vunz youq ndaw ranz namh lailai bae!

(*lauxsae son’gyauq*/指导老师 Lungz Gingyi/龙庆煜)

Dangz Goq Nanz Lumz Ndeu

上林县大丰镇中心学校四(2)班 Veiz Yinhdungz/韦欣彤

Miz aen dangz goq duenz cihsaw ndeu, hawj gou nanz lumz.

Ngoenzhaenx, Vangz lauxsae byaij haeu gyausiz, riunyumnyum yawj gyoengq doengzhag naeuz: “Gyoengq doengzhag, ngoenzneix raeuz daeu duenz cihsaw, baenz mbouj baenz?” “Ye!” Daengx ban angq hemq. “Baenz, lauxsae sien ok aen daezmoeg daih’it, ‘gaemz ndeu haeb goengq rieng vaiz’.” “Cih gau! Gau! Gau!” Vah lauxsae ngamq dingz, daengx ban couh gangj ok dapanq. Lauxsae riunyumnyum dwk ngaekngaek gyauej, iet fwngz vad doxroengz, heuh dou caemdingh. Lauxsae ciepgangj: “Vunz caij fwj.” “Cih vei!” Boux doengzhag ndeu ndwn hwnjdaeu gangj ok dapanq. Lauxsae daengz fwngzmeh coh de. Dangseiz de naj riu sim angq lailai.

Lauxsae ciepgangj: “Aen mak rox gangjah.” Diuz daez neix hoj lai laengz dawz daihgya lo. Ndaw gyausiz dangseiz

couh caemrwgrwg. Gyoengq doengzhag mwngz yawj gou, gou yawj mwngz, geizheih dangqmaz. Miz mbangj daz rwz nyauj naj, miz mbangj ngeix bae ngeix dauq, lij miz mbangj dawz bit sij sij. Gou siengj: “Aen mak rox gangjah, dwg mbouj dwg cih ‘go’ ne?” Hoeng gou mbouj gamj haengdingh, gou lau gangj loek saetnaj. Loek couh loek, daihdamj miz guen dang! Gou mbouj caiq laux gijmaz, daihdamj ndwn hwnjdaeu gangj: “Lauxsae, dwg cih ‘go’ deng lwi?” “Deng!” “Ye!” Daengx ban yiengj hwnj sing bekwngz goksasa. Gou sim’ angq dangqmaz.

Ciepdwk lauxsae hawj dou duenz haujai cihsaw, duenz deng miz ciengj, duenz loek mbouj miz ciengj, simhai daih’it. Singriu, singgo, singbekfwngz, daj ndaw gyausiz cienz ok gig gya.

Aen dangz duenz cihsaw neix caen mizyinx ha!

(*lauxsae son’gyauq*: Mungz Cwngzgen/蒙成建)



Raemxlangh Haij

Raemxlangh haij bongh hwnj gwnz raiq, youh doiq doxdauq.

Raemxlangh haij doiq doxdauq le, youh bongh hwnj gwnz raiq.

Raemxlangh goj dwg duz lwgnyez gauz, mbouj ngah caemdingh saek yaep nauq, ngoenz youz daengz haemh bae.

Raemxlangh haij bongh hwnj gwnz raiq le, youh deng daihhaij rag doxdauq.

Raemxlangh haij bongh hwnj gwnz raiq baez liux baez moq mbouj daengx mbouj duenh, yaek daeu gwnz mboek youz dahraix.

Raemxlangh ha, daeu vei, daeu gwnz mboek youz vei, riengz gou dauq ndaw byalueg gyaundeide bae vei.

Gizde miz ndoengfaex lailai geq cungj geq mbouj liux.

Ndaw ndoengfaex miz duzroeg lailai geq cungj geq mbouj liux.

Gizde miz ndoibya heusdswd. Gwnz ndoibya miz duzmbajraiz lailai geq cungj geq mbouj liux.

Gwnz ndoibya miz ndokva gyaundeide lailai geq cungj geq mbouj liux.

Lij miz duzrwi gwn ndokva

nyaengqnyatnyat nei.

Rumz gwnz ndoibya hoihhoh ci menhmenh ci.

Hoihhoh ci menhmenh ci heiqlhom ndokva sanq bae.

Raemxlangh haij ha, daeu vei, riengz gou dauq ndaw byalueg bae youz vei.

Ndaw ndoeng yienghyiengh cungj hawj mwngz sim’ angq.

Ndaw ndoeng yienghyiengh cungj hawj mwngz gyaemzmaij.

Gyanggoenz mwngz louz fiengx le, gyanghaemh couh ndeindei ninz, ninz youq raengzromraemx ndaw lueg. Ninz youq gungxdah youh laeg youh dingh miz ndoengfaexndoeck humx youq laj ndoibya ranz gou haenx.

Mwh mwngz yaek dauq daihhaij le, couh caeuq ga dah laj ndoibya de guhdoi. Yienghneix, mwngz couh mbouj lau loek roen lo, goj mbouj lau mbwq lo. Aenvih gadah lae haeu ndaw haij bae, youq gyang roen cungj angqvauvau guhfwen bw.

(*Daj 《Bonjsei Sim Lwgnyez》 (Veiz Gizlinz raiz) senj okdaeu, Lwgfwnzmeh/卢奋长 hoiz)*

